

Kalaallit Nunatsinni aalisakkat qaleruallillu tunisassiassatut qaqqinneqartartut ingitaqarani tamakkiisumik tunisassiarineqartarnissaat anguniarlugu Naalakkersuisut UPA2017-imi nassuiaammik saqqummiusseqqullugit peqquneqarnissaannik Inatsisartut aalajangiiffigisassaatur siunnersuut.

(Inatsisartunut ilaasortaq Jess Svane, Siumut)

Akissuteqaat

(Inuussutissarsiornermut, Suliffeqarnermut, Niuernermit Nunanullu Allanut Naalakkersuisoq Vittus Qujaukitsoq)

Aappassaaneerneqarnera

Inuussutissarsiornermut Ataatsimiititaliaq qutsavigaara siunnersuummik peqqissaartumik suliarinninnera pillugu, maluginiarparalu ataatsimiititaliaq isumaqatigiittoq siunnersuutip akuersissutigineqarnissaannik inassuteqarmat. Nuannaarutigaa ataatsimiititaliap Naalakkersuisut nunatsinni aalisarnermik inuussutissarsiuutitta pingaaruteqaqisup suliffissanik sapinngisamik amerlanerpaanik pilersitsiviunissaa tapersersormagu.

Soorluli ataatsimiititaliap tikkuaraa pingaaruteqarpoq nassuiaammik suliaqarnerup ingerlaqqinnissaani isiginiarneqassasoq tamakkua iluaqutigineqarsinnaanerisa imminut akilersinnaassusiat. Suummi nioqqutissiarissallugit periarfissaqartut tamarmik, tamatigut aningaasarsiornermiit isigaluni silatusaarnerusangimmata. Illuatungaaticullu aamma pingaaruteqarpoq eqqummaarinnissaq naleqarnerulersitsiniarluni nioqqutissiornissami periarfissanut nutaanut.

Ataatsimiititaliallu ingerlaqqilluni isumaliutissiisummini aamma tikkuarpaa nassuiaasiami isiginiarneqartariaqartut sulisussanik pissarsiorarneq taakkualu tigummiinnarniartarnerini unammilligassat. Taakkualu aamma suleqatigiissitap nassuiaasiamik suliaqarnermik ingerlatitseqqinnermini ilanngullugit isiginiarumaarpai.

Taamatut oqaaseqarluni siunnersuut aappassaaneerneqarnissaanut ingerlatseqqippara.